

128 *Relation de la Nouvelle France*

des pauvres Sauvages de la Nouvelle France, & pour taseher d'en assembler bon nombre dedans l'Isle de Mont-real qu'ils ont choisie, estimans qu'elle est propre pour cela, leur dessein est de leur faire bastir des maisons pour les loger, & défricher de la terre pour les nourrir, & d'établir des Seminaires pour les instruire, & vn Hostel-Dieu pour secourir leurs malades. Tous ces Messieurs & Dames s'assemblerent vn Ieudy vers la fin du mois de Feurier de cette année 1642. sur les dix heures du matin en l'Eglise de Nostre Dame de Paris, deuant l'Autel de la Sainte Vierge, où vn Prestre d'entr'eux dist la sainte Messe, & communia les associez qui ne portent point le Caractere. Ceux qui le portent celebrerent aux Autels qui sont à l'entour de celuy de la Sainte Vierge: là tous ensemble ils consacrerent l'Isle de Mont-real à la Sainte Famille de Nostre Seigneur, IESVS, MARIE & IOSEPH, sous la protection particuliere de la Sainte Vierge ils se consacrerent eux mesmes, & s'unirent en participation de prieres & de merites, afin qu'estans conduits d'un mesme esprit, ils trauaillent plus purement pour la gloire de Dieu, & pour le

salut